

廣
西
名
勝
志

廣西名勝志卷之五

閩中曹學佺能始撰

柳州府

在省城西
四百里

領州二縣十

以地當柳宿也唐貞觀八年改自南昆州者本漢鬱林郡之潯中縣地孫吳析置馬平縣梁大同三年八龍見於江乃卽江南置龍州及龍城縣故唐天寶元年改爲龍城郡矣至乾元始復柳州○唐元和間刺史柳宗元登柳州城樓寄漳汀封連四州詩城上高樓接大荒海天愁思正茫茫驚風亂颭芙蓉水密雨斜侵薜荔牆嶺樹重遮千里目江

流曲似九迴腸共來百越交身地猶自音書滯一方
魏滯四事珥云牂牁水既與龍融二江合過柳州宛轉環遶如壺城蓋水比來還轉向北東處如壺之傾城則居其腹也柳山廻互交錯而水從之所謂江流曲似九迴腸者以此○柳江在城南一名潯水源出懷遠流經象州歷潯梧至廣東入海柳子厚詩柳州柳刺史種柳柳江邊談笑爲政事推移成昔年○東亭在江南岸柳宗元記畧云出州南熟門左行二十六步有棄地在道南南值江西際垂楊傳置東曰東館其內草木猥興至是始

命拔剗蠲疏樹以竹箭松檉桂檜栢杉易爲堂亭
峭爲杠梁下上翺翔前出兩翼憑空拒江江化爲
湖衆山橫環嶠閣潏潏灣當邑居之劇而忘乎人間
斯亦奇矣○相子堂在城西柳宗元種柑於此其
詩曰手植黃柑二百株春來新葉遍城隅方同楚
客憐皇樹不學荊州利木奴幾歲開花聞噴雪何
人摘實見垂珠若教坐待成林日滋味還堪養老
夫○集古錄云柳州文宣王新廟碑唐元和十八
年八月立刺史柳宗元撰文○羅池廟碑昌黎韓
愈撰文其畧云羅池廟者故刺史柳侯廟也柳侯

爲州三年柳民旣皆喜悅嘗與部將魏忠謝寧歐陽翼飲酒于驛亭謂曰明年吾將死而爲神後三年爲廟祀我及期而死三年孟秋侯降於州之後堂歐陽翼等見而拜之其夕夢而告曰館我於羅池廟成過客李儀醉酒慢侮堂上得疾扶出廟門而死明年春魏忠歐陽翼使謝寧來京師請書其事於石○孔溫裕宣宗時爲補闕以諫討党項羗謫柳州司馬○劉資字去華嘗對策文宗極言宦官之禍因得罪貶柳州司戶叅軍卒於柳李商隱有詩哭之舊墓在城西五里 國朝桑悅字民懌

以調柳州侔不欲往或問之曰宗元小兒久擅此
州名往一旦掩倨其上不安爾悅弘治間吳人

馬平縣 附郭

釋詳郡下向爲柳州治所宋咸淳初曾徙治干柳
城之龍元 我朝復還馬平○唐戴叔倫過柳州
詩地盡江南戍山分桂北林火雲三月合石路九
疑深暗谷隨風過危橋共鳥尋羈魂已愁絕不復
待猿吟○柳河東集有柳州山水近治可遊者記
云古之州治薄水南山石間今徙在水北直平四
十里南北東西皆水涯北有雙山夾道嶄然曰背

石山有支川東流入于潯水潯水因是北而東盡
大壁下其壁曰龍壁其下秀石可硯南絕水有山
無麓廣百尋高五丈下上若一曰鼈山山之南皆
大山多奇又南且西曰駕鶴山狀聳環立古州治
負焉有泉在坎下常盈而不流南有山方正而崇
類屏者曰屏山其西曰四姥山皆獨立不倚北流
潯水潯下又西曰仙奕之山山之西可上其上有
穴穴有屏有室有宇其宇下有流石或形如肺肝
如蜂房或搏于下如人如禽如器物甚衆東西九
十尺南北少半東登入小穴常有四尺則廓然甚

大竅中黑燭之高僅見其宇皆流石怪狀由屏南
室中入小穴倍常而上始黑已而大明爲上室由
上室而上有穴北出之乃臨大野飛鳥皆視其背
其始登者得石枰於上黑肌而赤脈十有八道可
奕故以名其山多櫟多櫟多質當之竹多異鳥雀
其南有石魚之山全石無大草木山小而高其形
如立魚有穴類仙奕入其穴東出其西北靈泉在
東趾下有麓環之泉大類轂雷鳴西奔二十尺有
泓在石澗因伏無所見多綠青之魚及石鯽多條
雷山兩崖東西雷水出焉蓄崖中曰雷塘能出雲

氣作雷雨變見有光禱用俎魚豆蔬脩形糝糝虔
則應在立魚南其間多美山無名而深峨山在野
中無麓峨水出焉東流入于潯水○按峨山距城
西三里一名深峨山有雙瀑布飛流如鵝亦名鵝
山宋陶弼詩鵝山夏曉雲漫郭龍壁春深水遶村
○立魚山在江南岸里許以形似名山半巖洞玲
瓏前一巨洞左右二門通後二洞高廣明潔如堂
房可供遊宴山足有潭名小龍潭中多魚與大江
通江水消漲此潭隨之又里許爲屏山以其方正
類屏爲饒山以其突圓類饒又二里爲雷山兩岸

東西大山相向南有飛來廟最靈廟下深潭名大
龍潭柳子厚有雷塘祈雨文○仙奕山在城西南
詳柳記中又次爲駕鶴山旁臨大江聳掛如鶴古
州治之所居也又次爲新洞山與鵝山相對有洞
可坐百人石乳融結以杖觸之作鐘磬聲○背石
山在城北十里其東山曰桃竹西曰雀岡俗名夾
道雙山○龍壁山在城東十五里石壁峭壁下臨
大江郡城之下關也有洞曰關洞距城八里○柳
江卽城南江經江口鎮合相思埭永福雒容之水
下潯州與鬱水合是曰黔江○白蓮池在北關外

池有九竅泉出其中又城北隅有井柳子厚爲之
銘沈傳帥書見金石錄○陸道仙泉在城東南十
里仙巖之麓相傳有陸道人者脩煉于此巖洞玲
瓏泉流不竭有古詩刻甚多○仙人跡在城東北
十五里有石平地突出周半里許上有巨人跡二
相傳鍾呂二仙所帶按志城南亦有仙跡山其麓
有大雲寺唐初建後燬于災仍脩復之柳子厚有
後寺記見集中○西事珥云 國初洪武間馬平
主簿孔性善言溪峒蠻雖常亂擾亦有良心昔陳
景文爲令僅種甘蔗應差役厥後撫字乖方始仍反

饒誠使守令得人示以恩信諭以禍福亦當革心
向化 上嘉納其言命吏部凡臨溪峒郡縣擇賢
守令以撫輯之此事柳志不載令簿皆逸其名

雒容縣

在府城南
六十里

唐貞觀初析潭中縣置宋南渡後遷于洛清鄉

國朝萬曆四年以縣屢被山賊焚劫因徙上羅鄉
之嘉祿村爲今所○按雒清江在縣南半里自桂
江分流經縣界至郡城三江口入于柳江縣以此
名○舊縣西十里有龍鼻江發源托定雒斗鄉流
入雒清江○會通志在縣南白象巖有石鐘鼓擊

之鏗然○思微山去舊縣里許上有泉穴四時不涸屏石山在舊縣西北十里有泉嶁水出其中○如來山在縣南十五里高聳峭拔相傳有神女降於此

羅城縣

在府西北百九十里

本桂林之玖州洞地宋開寶中置屬融州熙寧中省入融水縣我朝洪武初復置屬融州十年州廢改今屬○東黃山在縣東有巖曰淵秀○鳳凰山在縣北二里又八里爲覆鐘山俱以形似而名○永山在縣西北四十里其上高寒四時常冰又

四十里爲葵山以形似之或謂其葉如葵故名○
石硯山在縣西九十里聖水發源於此○武陽江
在縣北界有二源一自亭懸里出一自平西里出
皆至武陽寨合流入沙拱江

柳城縣

在府北七
十里

亦漢潭中縣地梁置龍城縣宋景德年改柳城○
按張維廣西郡邑志曰梁大同三年八龍見於江
乃即江南置龍州及龍城縣隋開皇初徙治江北
州尋廢至元移龍江東 我朝因之○青鳳山在
縣西二里高百餘仞上有一竅通明亦名穿山○

烏巖山在城東南二里高聳臨江下有深潭澄湛
徹底以其山石純盧故名○勒馬山在縣北三里
舊縣治處○銅鑿山一名雲蓋山在縣西十里高
大峻聳雲霧常覆其上○筆架山在縣東十里尖
銳而秀故名○觀音巖在縣西北回環相通西有
臨西閣北有丹霄亭南有石田石盆池巖東有會
仙巖巖中有仙人跡丹爐○龍江在縣西源出廢
遠與融水合流來會柳江○湧珠泉在城西七十
里有地湧出市中相傳諸葛亮孔明南征過此馬
跑其地其泉湧出故又名馬跑泉

懷遠縣

在府北三百一十里

本牂牁夜郎之境宋至和中置王口寨崇寧四年因王江古州蠻納土賜懷遠軍尋改爲平州仍置附郭懷遠縣我朝洪武十年州縣俱廢以縣置

三江鎮巡簡司十四年復置縣○按平山在縣北五里宋建平州以此一名屏山其下爲治平洲廣數百畝可以耕種○今縣在丹陽洲卽古丹陽鎮也蒼帽山在其北珠玉山在其南天馬山在其東掛榜山在其西又北爲大桂山再遠爲唐朝山與湖廣通道縣界○九曲山在下石門其山巔處高

萬仞怪石巖巖中有一泓碧練千尺○石門山有
四江左右兩山夾峙崖石峭壁若門古州江出黎
平古州合容江及靖州諸水至縣○板江在縣北
界源自扶勞山出牛頭上甕經邊田入大江○蕉
花江在縣北二十里源自蕉花村至江口入大江
又十五里爲田寨江源出吼江北原經田寨播營
丹竹入大江又三十里爲西波江源自白雉山入
耳邊江會合水江○四里江自大理馬平經白花
古利龍塘入潯江○斗江水自江源大地入潯江
○大融江古州清水江之水出焉卽舊縣西北大

江也

融縣

在府西北二十五里

隋置融州唐天寶初改融水郡其城卽天寶時築
東臨融水矣乾元復爲融州俱以融水附郭 國
朝改州爲縣省融水入焉唐柳宗元詩荒山秋日
午獨上意悠悠如何望鄉夕西北是融州○獨秀
山在縣西一里挺然秀發上干雲霄又里許爲旗
山勢稍衍迤香山廟按其麓舊有香山驛宋元間
遷學宮處○老人巖在縣西南四里舊傳有老人
拄杖悠然其上故名巖巖隆起度高千仞山腰削

壁忽開巖竇朗明軒豁登自山後石徑縈紆而上
屢憩乃至臨巖一眺俯視萬家雲際諸山如在几
榻○玉華巖在城西北四里巖間有一石蹲踞如
虎昂首而上驤又一石蜿蜒垂首而下眈俗號龍
吟虎嘯者以此○劉公巖在城南四里舊名西峯
宋紹定間郡守劉繼祖命報恩寺僧知性闢之祇
碍剔穢豁然虛明因以劉公名○德巖卽彈子巖
也在城西五里玲瓏崆峒潤四五丈高如之內產
石子如彈因名○真仙巖在縣南六里仰視高遠
青白鋪雜靈壽溪出焉泠泠清響作環珮聲中有

白石如天尊像舊名靈巖山又名老君洞宋咸平
中改爲真仙巖頒太宗御書百二十軸藏於內張
孝祥磨崖大書天下第一真仙之巖八字又有宋
元祐黨籍碑巖背里許平地中有二潭相連大者
數十畝小者一二畝水色紺碧中多靈產名安靈
潭○雲際山在縣北十里甚高峻上有翠玉寒碧
二泉山頂出雲多雨雲淨則晴近西爲石門山背
江兩山夾峙崖石峻削如門狀土人謂之上石門
在縣下者謂之下石門○銅鼓山在縣西南二十
里舊傳諸葛武侯散埋銅鼓以服蠻獠後有得于

是山者山下爲銅鼓灘○採藍洞在縣東北二十里四面青山護列洞中平地如砥石上有硃書採藍洞三字○鐵船山在縣西三十里遙望髣髴一船尾插絕頂巖間又有仙女泉以七月七夕嘗有仙女浴于泉側○聖山在縣北四十里長安鎮高七八里上有廟祀虞舜因名近東爲四盤嶺上下二十餘里嶺道縈紆○寶積山在縣東五十里產鐵及盧甘石近北爲天堂嶺上有一泉長流不竭登板飲者以爲天堂也○潭江合縣保江浪溪諸水與龍江并入于柳○保江出縣北杲村至魚樓

浪溪江出縣大段村至長安靈壽溪在縣西南出
六村背江在縣北流經羅城俱入于柳○覃光佃
融州人宋開寶六年進士爲監察御史彈劾不避
權貴京師呼爲直御史○張守約濮州人歐陽修
薦其習邊事權知融州峒將吳儂恃險爲邊患悉
捕誅之後脩復薦可任以將軍因請開條利害多
所見納

來賓縣

在府南
七十里

唐志嚴州下注云乾封二年招致生獠以秦故桂
林郡之嚴州置來賓循德歸化三縣宋朝會要云

開寶七年以來賓縣隸象州按至我朝始改今

屬○白雲洞在縣北二十里洞至深邃常有白雲籠罩其上○石牙山在縣南三十里平地有石峭拔如象牙又三十里爲金峯山方輿勝覽云山有寺大石當其殿前寺僧禱于雷神欲去此石忽風雨晦冥頃之間霹靂則石已移在山中宋有佛日禪師金華開山第一祖也○思玉山在縣北四十里舊經云昔人有得玉于此山者再來求之不得因以名○居松山在縣南四十里山有石門有自然石盆夏生蓮花常有魚戲盆中又十里爲穿山其

山有穴南北相通相傳馬伏波時獲白鹿於此○
瑤象山在縣西瑤光臺記云郡之西山聳秀葱翠
四時寒暑陰晴變態不一當其天宇澄霽條爾冥
濛紅日朝暾遊雲間出悉爲白象之形宛若生成
奔逐飄逸於西山之上○雙泉巖在縣西北嘗有
士人讀書巖中而患無水忽一日雙泉湧出濶丈
餘夏涼冬溫○武禪山在縣境昔時有武志士者
脩煉于此每出赴人齋供則架青布幕爲橋去五
七里達至市廛宋皇祐初白日上昇○大江在縣
南發源遷江縣都泥江流合柳江特柯水自祥河

來注之元和郡國志云嚴州有長水自牂牁流下
來宿卽此水也○古郎城在縣東南五十里九域
志云在古郎山蓋以山得名周廻一里○廢武化
縣在縣境唐初置屬封川後屬象州宋時廢

象州

在府東南一
百二十里

領縣一

漢武帝平南越以桂林地置鬱林郡而秦之象郡
更名日南今象州卽鬱林郡之中潯潭中二縣地
也陳置象郡隋廢郡置象州至今仍之○象山在
州治西山多出雲其上有一巖白石如象象州之名
本此○鳳凰山在州東二里與東岡山相連○燕

子巖在城北巖中空洞可容千人群燕巢棲于此
其下有碧潭亦名龍潭山○白面山在州南七里
石壁橫截大江如白面然又三里爲鷺鷥巖一名
鷺鷥峽其上有石約四尺許扣之如鐘鼓聲呂景
蒙名之曰石樂○居鹿山在州東北四十里上有
鹿池舊經云天欲雨輒先有雲如鹿起于池中○
獨微山在州南五十里舊名天益山宋乾德間邑
婦獨孤氏與夫妹傲氏採葛山中飲泉見有雙鯉
戲水傲氏取之身陷其中獨孤氏往救亦陷俄無
形影月餘在室中呼其父母曰吾二人乃仙女因

有過謫於人間今當還故來辭耳衆咸異之呼爲
獨傲仙女亦以名其山○濮泉在州東四十里松
檜森羅水石交映州人遊賞之地其上爲石牛山
山多怪石常有雲霧蒙罩天色晴霽儼然牛像頭
角俱全○又二十里曰雷山莫休符風土記云天
欲雷雨則此山先有雲霧又四十里爲聖塘山高
峻懸絕昔有藤根垂地人或攀藤而上有一池水
清冷可愛魚鱉遊泳桃李樹環遶之且多猿猴及
藤爲風雨折去人跡遂絕○象江卽柳江也經州
城西而州東七里有七里江出天堂嶺入于象江

○滎陽鄭璠自象江得恠石六其三聳而上銳又
一如世間道士存思圖人肺胃肝腎次第懸絡又
一空而隱外若癭癰殃疝病不好物者又一色糾
冰而理平漫彈之有好聲璠爲象江守三年後還
長安無家寄止人舍下計輦六石費俸錢六十萬
璠嗜好有意極類前輩人李義山記之○象州清
規院池中有龍居焉寺鐘常夜飛入水與龍鬪勝
而歸則聲振林木偶一夕不回僧往視之見龍蟠
踞鐘上寺隨廢水落清徹猶見其影○王世則永
福縣人宋太平興國八年狀元淳化初直史館以

言儲貳事忤旨出知象州有惠政及民祀名宦○
象州有橋宋紹興間知州陳太和所築以便民之
往來公字仲容莆田人州解闕有率齋學士孫觀
記○國朝象州人呂景蒙弘治間監察御史以直
言謫潁州判後稍起廷評不赴著柳州府志十六
卷藏用集三十卷又有定性發蒙象郡學的二書

武宣縣

在州東南
九十里

本隋始安郡之桂林縣地唐武德四年析桂林建
陵縣南置武仙縣乾封省桂林縣入焉宋元如之
國朝改名武宣○仙人山在縣四十里嶺表記云

古仙人隱此柳宗元詩云寒江夜雨聲潺潺曉雲
遮盡仙人山○仙巖山在縣南四十里巖高一丈
深十倍之可容數百人壁上有仙人影中有泉滴
成乳○石羊山在縣西六十里峭壁上有石如羊
俯臨大江江中石影頭角尾蹄俱全又石上有大
字六行隱約如草書無路可行莫能辨其真相傳
以爲古仙畱題○銅鼓灘距縣十里昔馬援南征
得銅鼓于此廣化記曰獠人鑄銅爲鼓以高大爲
貴而濶至丈餘者初成縣於庭尅晨置酒招同類
來觀○永通峽一名斷藤峽在縣南三十里接潯

州界民謠曰昔永通今求通求不得葬江中誰其
作者憶陳公按卽都御史陳公金也詳左江下○
宋栗大用年九歲以通五經應童子舉真宗見而
奇之補登仕郎○謝洪與其弟澤皆以文學知名
時人目爲二鳳南遷名賢館于其家者甚衆已上
皆武宣人

賓州

在府南百三十里

領縣二

唐貞觀五年置以賓江而名本漢鬱林郡之領方
縣也唐至德二年改爲領方郡乾元元年復爲賓
州○領方山在城東一里古郡縣名皆因之今設

學宮處有元淳祐中進上題名碑○仙影山在州
城外相傳有二仙女遊此因留影巖石間舊設解
鞍驛在焉宋陶弼詩月竚星冠七大夫遠看還有
近還無瑤池侍女變成道遺下神仙聚飲圖○州
南門外圓珠嶺在大江之濱如珠圓抱故名又里
許爲銅鼓嶺嶺上行人逢逢有聲如銅鼓也又三
里爲頂山舊傳漢陸賈使越時所經又三里曰武
詠山又五里曰南山○葛仙嶺在州西十五里有
洞深邃可容數百人宋乾道間知州葛翁葺亭其
上右在馬嶺之傍○與馬鞍山相連者白村巖也

舊傳巖中暗通武緣縣以火燭之乃可行○又五里爲金鷄山舊傳有金鷄飛集其上又二十里爲古漏山泉如滴漏四時不竭州守王舉開浚得之甘冽可飲○羅鳳嶺在州北十五里形勢蜿蜒爲治屏障近東曰銅泉山以出銅泉故名○又三里爲石壁山與白羊山相對其側有廖平巖清勝奇絕四圍堅密如城郭宋時廖陸祖者居此○鎮龍山在州東南燈臺山在州西南各八十里極其危聳接南寧永貴武緣上林諸界迤邐二百餘里○寶水在州西南三十里自賓水派合東流出李依

江合于柳○李依江源出鄧瑯鄉過遷江趨于柳
右融州商船俱于是出○武陵江在州東三十里
源出武滌山合浮江水○白鶴泉在州南三十里
源出南山至瑯瑯鄉通鶯寨泉俱合李依○賓州
故城在今城南十里宋開寶間知府楊居政遷置
今改賓化鄉○廢領方縣漢置應劭註地里云爲
都尉治所按志唐于縣置賓州宋遷至舊城北三
十里今廢○楊居政宋開寶中知賓州始創治解
築城以衛居民前守蒙延永爲賊所害居政撫其
二子買田宅以贍之○梁仲保賓州人也充本州

團練使時儂智高引衆來攻仲保迎戰勝負相持
累日賊衆益集城陷死之後人追傷爲保立祠享
祀不絕也○元楊維禎狄武襄吟賓州海月光團
團劍花火樹燒爛班將軍如內客未散捷書已冠
崑崙關當時諫官疑武士豈知辨賊遞如此於乎
銅面將軍今豈無世無丞相龐公甘老死蓋詠其
破儂賊事也○宋紹聖中王鞏以蘓軾黨謫賓州
旣歸出侍兒柔奴進坡酒坡謂柔奴廣南應是不
好答曰此心安處便是吾鄉坡因作定風波辭贈
之辭曰嘗羨人間琢玉郎天教分付點酥娘自作

清歌傳皓齒風起雪塵炎游變清涼萬里歸來年
愈少微笑時時猶帶頰梅香試問廣南應不好却
道此心安處便吾鄉

上林縣

在州北七
十五里

唐武德四年析嶺方縣置高州六年常厥開拓化
外改南方州貞觀元年改澄州宋開寶五年廢澄
州爲上林縣至今因之縣西南一里有勝業寺卽
祠厥者○扶嵐山在縣北五里其山八分矗若扶
欄因建八角仙亭于上又五里爲石光山巖石晶
絜日照之有光○古祿山在縣西七里上有石壇

號仙殿宋雍熙中有盧氏年十歲登山采茶遇仙
於此又縣南五里古祿水出焉○思隣山在縣西
五里昔有何隣者精道術年百餘歲隱居于此後
不知所適鄉人思之故名又里許爲羅勾山以山
勢盤屈如勾也又三里爲大明山蜿蜒疊聳中有
五峯挿漢四時雲霧隱現不常有深潭相傳吐
光時照數里又縣東七里嶺上亦有夜光與大明
山交映名爭光嶺○鑛錫山在縣南十里昔人有
得鑛錫寶劍于此故名又十里爲鷄籠山中洞宏
闊可容百人○石蓬山在縣東南十里平地特起

中有巖洞容數百人下有小江穿石縫中水清碧
多魚○止輦山在縣東四十五里平地突起圓阜
其形如輦上有古木一株亭亭如蓋○智城洞在
縣東二十里唐初常殷持節來伏生蠻後隱于此
因爲上林人有常敬辯所撰碑存○又三十里曰
羅洪山其中有洞宋常旻讀書處旻號白雲先生
遇異人有所得章子厚招至象臺勸其勿以榮辱
爲念因歸集書一樓閉門誦讀無所不通鄉人以
書樓目之象臺卽今州驛所○獅山螺山俱平地
特起與羅洪山相向有水出焉曰獅螺江○古涿

山在縣西南五十里古樹叅天遠望葱蔚其下有
古淶水○澄江出大明山下入馬波唐以此縣爲
澄州治所其名本之黃龍江里仁江化龍江周江
皆在縣北其流注于馬波馬波發源茶江流入遷
江有章光水淡竹水樊廟水皆合注之○清趣橋
在城南門外又數百武爲萬松橋○琴水橋在無
虞鄉單竹橋在感化鄉石蓮橋在古淶里皆名之
雅醇者無虞鄉卽廢無虞縣也

遷江縣

在州東北
八十五里

唐羈縻之思剛州也宋天禧四年改今縣屬賓州

以遷江水爲名○鐘山在縣北一里其下有巖○

寶積山在縣東二里疊石崔嵬不通道路頂平可

居○印山在縣西二里上有石盤瀦水盤內時出

石魚一雙中有八仙洞下有白石牛身全見而二

足隱又一里爲煙合山層巒疊嶂林壑深蔚時出

煙霞故名○泊艦山在縣北五里其下有巖足容

數百人石筍奇甚舟過者皆駐觀之○古黨山在

縣西十五里唐書有黨州乃開古黨洞時置又有

澄江洞俗人所居無田而有山畝刀耕火種○湖

泉在縣西八十里泉水湧出一日三潮自羅月鎮

入于都泥江○鷓鴣山在縣南二十里郡志又謂之白鶴山其下有洞名白龍江水出焉曰龍江縣西二里有賀水又八里有武節水縣南十里有武繩水皆流注之

廣西名勝志卷之六

閩中曹學佺能始撰

慶遠府

在省城西
南六百里

領州一縣四

秦屬象郡漢交趾日南二郡界後沒於蠻唐初招
降置粵州州有河為神龍所居天寶元年因改名
龍水郡乾元元年復為粵州乾符中更曰宜州宋
宣和元年陞慶遠軍節度更龍水曰宜山咸淳初
以寧宗潛邸陞慶遠府至今沿之其城相傳唐刺
史吳懷忠築 國初洪武二十九年因設衛乃拓
開舊址合之得一千三百丈北以江為壕東西南

三面引官陂水爲沼延袤二千餘丈又有鐵城在府城北二里宋寶祐間築黃應德記○廢宜州貢院在府城南宋時置元廢○南樓在府治前城南門樓也有黃庭堅所書范滂傳刻石于上後嘉熙三年樓燬刻併不存石魯直真蹟字徑數寸筆勢飛動爲趙忠定公汝愚所得寶宜篋笥每遇名流輒求題跋云○明遜國記載建文帝旣遜位削髮披緇執楊應能度牒雲遊四方自湖蜀入湘至廣西慶遠府寓西竺寺時有指揮彭英者先曾侍衛或傳有異僧至英往訪之心知其爲帝也嗚咽

不自勝饋蒸羊 帝起作偈繞而誦之乃食既登
丹英復多所贈獻 帝解所乘馬酬之復作偈曰
蹴路人間知幾年艱難險阻共周旋我今別爾東
西去何日相逢兜率天及解纜馬忽騰躍潛然而
斃多記近事○月山叢談四卷郡人李文鳳撰

宜山縣 附郭

唐龍水縣爲宜州治宋嘉祐七年省洛曹縣入焉
宣和間改今名以有宜山在縣北二里龍江上江
源自貴州都勻府流至城北而東兩岸石筍孤峭
直下柳城合於融江○北山一名會仙山在城北

廣德寺在州西一里上有白龍洞洞有石龍鱗甲宛然唐末河東陸禹臣嘗遇軒轅彌明授以仙術且曰子之成功當在山窮水絕之處禹臣乃歷覽至宜鴈吳生家生師事之因與登覽歷遍大小巖穴凡二十所遂居大巖修煉不復出手植異桃石榴歲久不凋後屍解仙去又里許爲天門山兩峯如削率律叅天宋馮當世祖墳在焉其子孫所居曰馮村○南山在城南五里山有洞軒敞如屋中有石龍鱗甲皆具因名龍隱洞前有廣化寺宋真宗嘗賜御書十六軸藏之閣中州有處僧者名德洪自幼棲止于

寺一旦不知所之州守張自明建昌人寓京邸有
一僧來謁自通其名與所居遂畱之談出一屨爲
券及自明至因遊南山問德洪所在衆僧愕然曰
此僧別去不知所向久矣自明乃焚香祝曰汝如
有靈引我以香已而香拂山背石室中隨往觀之
有一竅燈光微明德洪坐化于內隻屨在前正與
所遺者爲對○九龍山在城西南六里山有石田
高低井井洞口一潭深不可測張自明一日集諸
士民言曰吾入關矣士民隨之詣此山入洞光景
殊別有石碑題曰宋刺史丹霞張公之墓鑄磨若

宿構自明飄然而入洞口漸合今石門僅容一人側身而進○日山在城東隔江九里其西有月山距城二十五里皆以形肖而名古識云東有日山西有月年年征戰無休歇賴得西水向東流世代永無憂○香爐山屏風山在德勝鎮羊角山在河池所俱屬府西○龍泉在城南二里泉湧僅一勺然灌溉甚廣其水重于諸水黃魯直編管宜州暇嘗稱之果然泉上有石橋舊名歐公橋山谷易之曰龍濟橋○西事珥云黃魯直言余謫宜州半載官司謂不當居官舍乃抱被入宿於城南所僦舍

上無雨益下無風障市聲喧聒人以為不堪余家
本農使不從進士籍仕宦則田間廬舍正亦如是
亦何所苦也○馮京本宜山人父商寓鍾津往來
江夏遂占籍鄂州京中三元仕太子少師致政今
尚有三元祠在學內○區革宜州人與黃魯直友
善後爲瓊州理魯直送以詩有逸子之官瓊海上
鯨吞舟楫蜃樓虛之句○何旦宜州人嘗爲海南
都巡簡使與蘓軾遊多得其筆跡還家橐中一亡
所有親識或嘲之旦出所藏軾書示之曰此海外
奇珍也人服其風尚○趙抃衢州人慶曆中爲宜

州別駕愛民如子尤加意士類暇則集諸生會于
香山梵宇相與講明有一戍卒誤殺人法當死方
繫獄病疽未潰梓使醫療之得不死尋會赦免其
愛人之周類此○俞若著崇寧間判宜州時黃魯
直謫居黨禁甚嚴士大夫削軌掃跡若著獨爲經理
舍館敬禮彌至又遣二子相從時論嘉之○南渡
乾道八年舒璘字元質通判宜州謂所知曰做床
䟽席總是佳趣櫛風沐雨反爲美境璘浙江奉化
人○張自明字誠子以宜州教授攝州事崇重教
化創龍溪書院課士其中士風爲之易嚮又新

太史祠而自爲記畧曰初度地有細民宅其旁夢
有人云此非汝所得居亟去之及鳩工祠旁又一
民夢曰汝輩勿汙此坎屋陰地數尺有器以錫汝
民如言坎地得一古磬云○通志載宜州吳某妻
鄧氏其夫在戍所鄧以衣寄之而侑以一絕云欲
寄寒衣上帝都連宵裁剪眼模糊可憐寬窄無人
試淚逐西風洒去途題畫菊云良工妙手恁安排
筆底移來紙上裁葉綠花黃長自媚等閑那與蝶
蜂來

天河縣

在府北
九十里

輿地廣記云唐與州同置宋大觀元年隸融州靖
康元年改隸宜州○北陵山在縣西二十里麓有
泉水里人有吳生者師事陸仙翁脩道於此○三
潮水在縣西一十里一日三潮潮退則其流一線
可以溉田因名聖水○湘山寺在縣城北宋時建

河池州

在府西二百十五里

領縣二

本唐羈縻智州之地宋初置河池縣隸宜州省富
力縣入焉大觀元年於此置庭州以縣爲懷德縣
隸之四年廢庭州其懷德縣復爲河池縣隸宜州
元因之我 國朝洪武初省三旺州入焉弘治間

陞爲州○吳山在州前其下卽秀江也智州山在

州西四十里綿亘百餘里舊智州治設此○金城
江在州東五十里舊金城州以此爲名太平山在
金城江次巖上鐫天下太平四字○西事珥云河
池州近山地牧童十餘人群聚歌舞或吹笛戲方
劇忽山半一人約長二丈面潤三尺餘披髮烏喙
背有二翼俯觀群童爲樂嬉然而笑垂舌長過腹
群童顧見大驚皆反走其人能夷語呼曰合合勿
去仍歌舞吹笛以樂群童復聚吹笛歌舞如故其
人喜拊手大笑聲震林樾已而垂舌久之始去

思恩縣

在州西一百五十里

廣記云唐貞觀十二年開生蠻與環州同置因屬焉後州沒於蠻宋熙寧八年以環州思恩隸宜州我弘治間改今屬○寒山在縣南五里土人謂之寒坂以山高多風炎方之人甚宜之○緝山在縣北二十里土人謂之瞻嶺以其山嶂崇疊日光少見故名○石巖澗在縣東二十里三峯之下天成巖穴寬約五六丈有泉自穴中湧出○環江在縣南六里唐環州治也帶溪在縣北四十里源出荔波至此旋流如帶入龍江宋之帶溪寨設焉又十

里爲婆婆泉其泉常隱不見過者以有渴而求飲則湧出定名婆婆泉

荔波縣

在州西北百八十里

宋置荔波州以羈縻蠻人元因之屬南丹安撫司國朝洪武初廢入思恩縣十七年復析置荔波縣隸府正統十二年改隸南丹尋復今屬○方林山在縣北五里○水巖山在縣西十里其下有水從巖中出○勞村江在縣東南一百二十里○志云思恩荔波二縣西北界上與貴州爛土黎平諸夷相接不通王化有美杉生山下川類覆壓不知幾

十百年矣史云是諸葛丞相伐而埋之雖未盡然
要亦兩漢先秦時物也夷人每候其地有紫氣上
騰則群聚穿土輒得之紫色堅類牛角投於水即
沈解爲棺出市之

思恩府

在省城西
南八百里

領縣一

漢屬交趾唐爲思恩州屬邕乃澄州止戈縣地宋
開寶間廢澄州以止戈賀永無虞三縣省入上林
治平間以上林之止戈入武緣隸邕元屬田州路
歷代羈縻而已 我朝洪武初土官岑永昌歸附
授思恩知州仍屬田州永樂初改屬布政司特居
民僅八百戶永昌死子瑛襲瑛有謀畧善治兵左
當上官意前後鎮守大帥皆優異之洪熙間從鎮
遠侯顧興祖奏以武緣白山峒七百戶分屬思恩
宣德間復從都督山雲奏以上林湓溪峒八百餘

戶益之正統間瑛以功陞田州知府仍管思恩州
事瑛欲兼管田州府與知府岑紹交惡安遠侯柳
溥議陞思恩爲府又益以宜山八仙諸峒六百六
十戶從之尋改爲軍民府瑛以府治遐邇議改于
橋利又請置學校立師儒增廣生徒比諸內郡焉
時兩廣用兵多所調發總兵董興檄瑛討賊帥黃
蕭養破之瑛守柳慶又敗峒賊常公黜于賓州瑛
上首功四百五十餘累陞廣西叅政改都指揮同
知擢驍騎將軍都指揮使瑛死子鎮襲違逆自縊
以鎮弟鏐襲鏐死子濬襲濬以兵力雄長弘治間

屢寇思城果化上林都陽等寨攻陷田州逐知府
岑猛俘其妻子婦女百二十九人都御史潘蕃疏
其罪狀集兵進討濬敗死遷其家因議改銓流官
以雲南知府張鳳爲廣西右叅政掌思恩府事正
德七年增設鳳化縣治以流官諸夷猶未甚馴伏
覃恩劉召相繼爲變都御史盛應期遣官軍平之
未幾而土目王受與田州日盧蘇合謀煽亂勢益
猖獗新建伯王守仁受命至乃一意招撫而檄受
等破八寨賊爲張其功因列思恩地爲九土巡簡
司管以頭目授王受白山司巡簡得比於世官矣

又以思恩舊治瘴霧昏塞宜更之興澄于是擇地
荒田以建新郡割武緣止戈二里益之又議割上
林三里而移鳳化縣治于其處蓋寓犬牙相錯之
意嗣之者爲林公富所議遷郡割止戈里俱如公
指惟以三里當設衛而并鳳化縣裁之遂令府治
益孤嘉靖十三年鎮安岑金寶詐岑濬子謀并思
恩守備高乾督九司征之誅金寶十六年鎮安又
糾衆謀亂叅將沈希儀誘至柳州殺之其後九司
日恣所轄夷民不堪知府陳璜曲加綏戢自把劉
現盧圓以復土爲名鼓衆煽亂副使翁萬達因有

事安南計擒盧回殺之招回九司從亂者三十餘人最後東蘭岑瑄詐稱岑濬子起雲謀復土官卒爲九司頭目所縛萬曆七年督府吳文華謂九司日以驕黠編民甚少縱惡難恃奏割南寧武緣縣屬思恩自是思恩稱巨鎮矣○右江大志曰舊治四面絕壁首據礧礧觸處皆芒利矜研之石如在矛戟中瘴霧皆塞薄午始開今治四野夷曠軒豁秀麗後山起伏蜿蜒敷爲平原兩溪繞山合流而入巨浸江水旣通商貨輻輳比於內地云○同知吳赴登郡籌邊傳詩高壓郡西城籌邊不浪名江

山三面敵鷄犬幾家聲敗葉煙中靜危橋竹外明
公餘一登眺觸處盡詩情又過官塘四野陰靈一
夜清風花煙柳報新晴橫塘渺渺舍其西黃犢家
家帶雨耕題普濟橋路遶平田水遶堤草虫晴戲
野禽啼石橋斜日林塘晚絕似肩輿過竹溪○府
志云獨秀山在舊城東半里一峯獨立不與群山
相連八景中獨秀晴嵐卽此○仙女山在舊州城
內前有大澤水光如鏡俗名仙女照鏡潭○白雲
棲霞滴玉通天諸巖俱在舊州左右舊州距今治
以五六里○閩山人傳汝舟者同太守周璞遊郡

內諸山川其題城北十里暗山詩云亂山盤一逕
衆水伏無門谷助猿聲響煙蘿馬色昏息陰遙問
樹具食隅逢村今日來遊意祇堪許靖論又題五
峰詩平野獵歸風色暮五峯迴處石門高穿巖村
老多燃炬供酒狼家煮帶刀雲氣乍孤山下雨松
聲遙捲峽中濤不堪仙竈埋幽草極目丹崖思獨
勞志謂五峰在舊府學前內有仙巖石室○知府
周璞同傅山人遊獅子巖數載塵埃笑白頭來風
今喜到巖山勢迴西北瞻宸極形勝東南鎮粵州
半榻幸同遺世士一官深愧富民侯雲蘿石壁平

生興即欲投簪向急流石巖在郡東南中空石懸如乳人物花鳥多所奇狀○清水江在郡城北有通津二水出城中合橋利以及馱蒙江皆流注之亦洪水涵之下流也○人影山在洪水江之右有人影在山半石壁上作招搖態

武緣縣

在府南五十里

本漢領方縣地梁屬嶺山郡隋置縣尋省入嶺山唐武德間復置宋景祐間益以廢樂昌縣地屬邕州明興因之至萬曆七年始改今屬○起鳳山在縣東十里平地特起兩峰軒翥如鳳上有飛來

寺○伊嶺山在縣南三十里上有懸巖宋嘉定間
周師夢結菴脩煉于此有古刻詩像銘贊○西江
在縣西門外源出大明山劍江至白范村合仙湖
江抵縣城西相傳水中有石鼓擊之必致風雨○
南流江在縣南二里源出大明山之淶黎江合下
沙博澁二水經陸啼下黃下洞諸村會西江流出
南寧入大江○江南岸有靈水江平底皆石泉源
湧沸夏月水漲流濁此獨清澈日光薄射五色晶
瑩昔有犀出岸傍頂發光采故以靈名

廣西名勝志卷之六終

廣西名勝志卷之七

閩中曹學佺能始撰

潯州府

在省城東南九百里

領縣三

江曰潯江東城門曰潯陽郡名取焉唐太宗所置也貞觀十三年廢屬龔州旋後置至今治之○潯江在府城東黔水自城北鬱水自城南至此合流東下蒼梧入海城南十里有羅葉水又五里爲淶水城北三十里有都耶水東北五十里之大隍水西南五十里之繡江皆入焉按志淶水出曠野中惟石甃其旁水泉深碧中有巨魚人以爲神不敢

采捕繡江與橫嶺水合流湛碧如繡卽唐置繡州處○唐曹唐澤江紀遊盡興南遊卒未廻水工舟子不須催正思碧樹關心句難放紅螺蘸甲杯漲海潮生陰火滅蒼梧風煖瘴雲開蘆花寂寂月如練何處笛聲江上來○嶺右遷客錄云唐常待價宰相挺之子也以得罪流放繡州詠歌之聲達於戶外○宋胡旦渤海人淳化中知制誥坐王繼思累謫潯州旦以狀元進身雖在謫所著書得三百餘卷嘗鑿大硯方五六尺刻記云胡旦修春秋硯○趙子松宋宗室也號鑑湖居士建炎初貶龔州

未幾放令自便值道梗未能歸寓居於潯先是宣
和間館職有謂子崧曰夜夢帝勅公爲白石洞天
主去後子崧竟沒於潯○魯幾贑州人號茶山居
士建炎初避地於潯嘗有詩云鷄犬圖書同一舸
老夫蕩槳兒扶柁潯江一繫欲生根夢下湖南向
江左○陳翥延平人權魯孫也慶元間爲潯州守
權故遷雷廉寓于潯士大夫高之刻高宗賜正彙
手勅于碑以風後學○魏濬西事珥云舊傳潯州
官圃有娑羅樹一株甚巨每枝生葉七片有花穗
甚長而黃秋後結實如栗可食唐李邕進娑羅樹

狀云此樹不庇凡草不止惡禽如得託根長樂耀
穎建章布葉重陰比月中之丹桂連枝接影對天
上之白榆東嶽則青郊苦而歲不稔西茂則白藏
忝而秋有成蓋異種也佛書一曰菩提樹一曰娑
羅樹云○禹卿又云予鉤校至潯時已近午節署
階前列菊二盆開花甚盛詢之云郝學博齋頭數
十盆獨此二盆忽花非常種也異之爲賦一詩云
五月能開九月花最憐炎日有寒葩閒看籬槿休
爭麗靜伴畦蘭併茁芽傍節未須愁乏酒落英還
取弔懷沙從來仙種多靈幻不與人間管歲華○

銅梁張佳胤左江道叅政也城北有馬氏園頗稱
幽勝肖甫時過之作詩云第宅西徧好林園十畝
開花名詢失譜禽語隔江來愛竹沿幽逕班荆席
古苔殊方懷土意賴此得徘徊○郡守陳紹功晉
江人題郡圃之卧齋種蔬蒔卉各四絕今錄其半
云堂叅罷設景蕭疎日費公家五斗儲將毋不求
甘旨奉親栽隙地有佳蔬又閉戶翛然不看書朝
來彈缺食無魚乎童且共灌園去不着衣冠即野
夫又郡齋半畝即花田煙雨來時翠色鮮更有清
香敷滿座寧須睡鴨噴沈煙又手栽花木滿欄干

山爲偷窺下羽翰鮮得此時同樂意畱芳更與後人看

桂平縣

附郭

本漢布山縣屬鬱林郡唐頒字德雅番禺人爲布山令寬和爲理卒之日人祀之梁置桂平郡隋郡廢於布山縣地置桂平縣屬尹州後屬鬱林郡唐武德間屬貴州貞觀初屬燕州七年始屬潯州十二年州廢屬龔州又省陵江縣入焉後復置潯州而縣屬之相沿至今○按貴州卽今府屬之貴縣也尹州在其縣南龔州設平南縣龔江燕州去今

沿西六十五里廢陵江縣在桂平之崇江里○縣境羅繡里有廢羅繡縣武平里有廢武平縣常平鄉有廢常平縣城隍井市俱存又有廢皇化縣本漢阿林縣地隋改皇化宋時省入○南湖在城南延袤二里中有洲洲上有平波南浦兩亭○銅鼓灘在城東一里多巨石春夏水漲響如鼓聲又下爲碧灘弩灘思傷灘砍石灘皆最險者○思陵山在城西五里一名西陵有巖曰三清巖宋淳化初州守姚嗣宗常遊因名姚翁巖有泉曰湧泉卽思陵水之源也○獅子岡在城西十五里以形似名

寶子嶺在城南三十里出五色石子如寶積然
鳳巢山在城西五十里下有龍潭○石鹿山紫
荆山俱在城北五十里又西爲羅影山○白石山
在城南六十里兩峯並立下有巖洞通北流勾漏
世傳葛洪常往來其間上有會仙巖磴道險峻而
巔甚廣可容數十人有煉丹竈八仙石俱在獨秀
峯側有泉曰漱玉始流微細鳴鍾鼓則泉湧出道
書第二十一洞天有清真觀一名陽明觀內貯宋
太宗御書○羅叢巖在縣西南六十里巖中明爽
可容三百人內有碧虛洞由石穴而入通行平坦

屈曲約半里許出於巖東洞內有石佛石鑿石獅
石床相傳宋程明道正叔二夫子築臺讀書於此
其下有靈源洞亦由石穴而入通行平坦其屈曲
約一里出於巖西內有石羅漢象馬魚龍之屬○
崑崙關在城西七十里又西南爲峻嶒嶺路極險
峻○雲合嶺在城南八十里危聳而秀雲合則雨
○石梯山在城西一百里削直如梯路通容管○
水表山在城東南頓嶺在城南俱一百二三十里
○閬石山在城北一百六十里一作基石峯巒競
秀如列旌旗五代時狀元梁嵩讀書於此嵩平南

人○永通峽在西北境大山夾江延袤數百里勢
極崎嶇盜賊所出沒 國朝都御史韓雍討平之
原名藤峽舊傳峽口有藤大如斗長數百丈連峽
而生公命斷之汁流水赤賊巢始空正德十二年
都御史陳金奏改今名鐫有勅賜永通峽五字于
石永通峽謠已見右江

平南縣

在府東一
百三十里

本漢猛陵縣地晉置武城縣劉宋改武林縣唐貞
觀七年分置平南後自武林移龔州治此領陽川
武林隋建大同四縣以益之宋以思明州之武郎

縣及大同等四縣省入紹興七年廢龔州以縣隸
潯州至今因之○按龔江在縣東南一名都泥水
西通邕宜二江東過藤梧入海縣有烏江白馬江
流注之唐龔州以此名○燕石山在縣東南十五
里圖經云每春夏群燕皆巢石頂唐以置燕州焉
○遊魚洲在縣前大江中秋冬潭清水涸洲出如
魚遊形○淶水河在縣東南二十五里接大江上
有石鼓扣之清越○蛇黃岡在縣北四里岡勢盤
紆出蛇黃每歲九月邑人掘深七八尺始得大如
雞子小者如彈丸其色紫磨之可傅腫毒尤治小

廣西各屬志卷之六
兒驚憫○思鵝巖在縣西二十里石狀如八角樓
又有高陽巖與之對峙巖宇高曠前瞰平野相近
有胡叟巖又有暢巖其中石門石榻流泉濺出宛
如跳珠又二十里爲西嶺宋守姚嗣宗詩井邑倦
炎酷西巖境獨清卽此○藍峒山在縣南六十里
竅穴甚多其下有藍峒村上有石脚巖或云通勾
漏○維靈山在縣東南八十里九峰錯立下有深
潭○高陽巖在縣西北九十里內有宋治平中詩
刻以地勢高而甸陽故名○廢思明州唐永隆初
之思唐州也後改思明後省入○廢武林縣在縣

之武林鄉劉宋置廢隋建縣在縣之建烏里隋時
置廢大同縣在縣之大同鄉廢陽川縣在縣之陽
川里俱唐時置前後省入○宋陶弼過思明詩幾
年來瘴外此夜宿溪中照枕殘鷄月吹燈落葉風
盧循猶僞國楊僕已衰翁起戴寒星去村前燒影
紅○五代梁高平南人劉龔白龍改元高舉進士
第一官至翰林學士見龔多虐政乞歸養因獻倚
門望子賦龔憐之聽其去贈遺不受但請蠲本郡
丁賦有差郡人頌德立祠祀焉今縣東六十里白
馬廟相傳高嘗乘白馬遊東壕墟過渡偶沒于水

因祀之其說誕妄恐不足信○西事珥云程大中
珣是嶺間知龔州時僚歐希範爲亂就誅忽傳其
神降當爲我立祠衆信之迎其神于龔珣詣之皆
曰比者過潯潯守以爲妖投之江中逆流而上守
懼乃更禮焉珣立使拔之順流而下其妄乃息○
佺攷晉書陶侃字士行潯陽人以忤王敦左遷廣
州刺史時王敦以王機爲交州刺史杜弘據臨賀
連結溫邵及交州劉沈俱謀反侃擊杜弘破之執
劉沈於小桂又遣部將許高討機斬之太興初進
號平南將軍縣之名本此○平南三鄉邑雖眇石

姓相看貧不了
鰲魚濺濺紫江流
兩下分頭恨人
少蓋元時人謠也

貴縣

在府西一百四十里

輿地記云廢鬱林郡在貴縣西廢鬱林縣在貴縣東廢南尹州在貴縣南按當縣原爲貴州唐貞觀八年改自南尹州者天寶元年又改爲懷澤郡至乾元間始復宋孝宗時陞貴州防禦使我 國初改州爲縣以鬱林縣省入○州城唐元和間刺史謝鵬因容管經畧使楊文討賊駐此乃借兵夫發古塚碑以築城宋紹熙間署郡譚景先修之○按

鬱林卽漢廣鬱縣也晉改鬱平宋開寶間改鬱林
爲州理注水經曰牂牁水又東經鬱林廣鬱縣爲
鬱小雷水注之是矣○縣城南江卽鬱江也縣南
四里汎水江縣東龍山麓沙江皆入焉又有寶江
一名浮江自賓州來東津江自巡司前龍江分來
橫肩江自鬱林州來繳江自興業縣來武思江自
博白縣來俱流注于鬱○鬱林郡故城吳鬱林守
陸績所築治東北有谷公井相傳漢刺史谷永鑿
也治東南有陸公井南漢乾和中刺史劉博古種
橘于井傍又名橘井○縣南鬱江之傍有紫泉無

源偶現紫色輒符嘉應自是邑人每候以爲祥縣
西北有石井亦通大江水竭則歲荒因名司命井
○廖家井在縣北塘中有石洲其上有紫紅亭遺
址○嘉魚井在縣西泉通江穴時出嘉魚又里許
爲南澗井東有卷石蘓軾大書南澗二字○又里
許爲東井怪石湧出水流石底又里許爲謝公池
以唐守謝離浚之而名○瑞松井宋孝子梁詔所
居傍有甘露著松樹上後爲廣東提刑幹官蘓軾
南遷與詔相見詢知狀爲署其亭曰甘露林曰瑞
松其讀書處曰薰風○龍腹井在縣北二十里水

深數尺攬之色濁汲之旋清禱雨輒應○潮水泉在縣西六十里其水盈涸不時或遇祈饗一日至三四十潮漢封其神爲澄瀾公唐設潮水縣於此至宋廢○南山在縣南十里上有七星巖二十四峰峭拔奇秀甲於一郡山中石室有石笋佛像龍田之屬有景祐寺宋咸平初嘗賜太宗御書凡二百二十軸藏於此○東山在縣東二十里峰巒秀特相傳唐時有何特進履光二人隱此山化爲石今山頂有石狀如二人並侍西北一峯望之如婦人搭幘簪花俗呼新婦巖○北山在縣北二十里

上有瀑布千仞禪僧羽客多所棲止古經云周穆
王時山上有物相鬪頃之一女子號泣云吾乃神
也因金牛星驅雷電與山頂石池神物相鬪今神
物已化爲石牛矣每旱殺牲取血和泥塗牛背以
鹹鹵塗牛口歌牧牛詩以樂之祀畢卽雨泥盡乃
晴又十里爲顯朝岡陸績爲守嘗登之仍鑄渾天
儀於其上○西山在縣西三十里五峯並立山多
躑躅花○銀山在縣東北上有石函望之如銀俗
呼爲仙函○龍影山在縣南唐莫休符風土記云
石壁上有五色彩畫龍形○思巖山在縣南七十

里山中有居思娥者人入山恒見之不知名姓世
代問之則曰此山中也人號之曰思巖異人山
多奇花果味與常別取而懷之輒迷不得出○龍
馬山在縣西北七十里山多虺其毒殺人川冷石
屑着瘡內即活俗傳有馬嘶及奔蹏聲主多疫癘
○登仙崖在北山路傍去縣七十里接神女嶺或
聞山上有宴樂聲則歲穰人安○馬嶺龍山皆見
唐書馬嶺一名馬度唐已前馬嶺縣設此龍山則
唐貴州懷澤郡下注云有龍山矣按唐書中山桓
彥範于中宗時反正有功爲武三思所讒出懷州

道御史周利用往窮其事遇於貴州遂被害則是
時貴州尚未改懷澤郡也又有懷澤縣在縣南一
百五十里亦唐時置宋廢今爲懷澤驛○縣境有
烏溝夷巢居皆射翠取毛剖蚌求珠以爲業卽漢
鬱林太守谷永臨招者今散處溪峒宋開寶中曹
克明知邕管時宣州澄海軍校陳進反鬱江暴漲
州城頽圯克明率丁夫伐木爲連舫維之水上狀
如郛郭又多設旗幟浮巨筏陳兵其上爲守禦募
谿洞兵三千與安撫使曹利用行次貴州遇賊大
破之徙宜融等十州都巡檢使○三江城處潯上

流鬱江水滙於此大宗伯蕭雲舉碑畧曰三江故
盜墟陽羨何公備兵分守謂宜縮轂其口於是城
之不三月而告成行營戍室官兵各所戟門牙衛
翼翼堂堂賊徒屏息民用安固公旋擢京卿中丞
撫茲嶺右啓績寔自濬始

鳳陽名勝志卷之八

閩中曹學佺能始撰

南寧府

在省城西南
二千二百里

領州三縣二

地里沿革論曰故稱邕管牂牁峙其西北交趾踞其西南三十六峒錯壤而居延袤幾千里橫山永平尤稱要害歷唐及宋建牙置帥與桂州等又郡地最夷曠可宿數萬師曩者征田州及經畧安南舉弭節茲土則其勢便也自徭夷不靖往仗很兵急則藉其前驅緩則檄爲守圉諸酋乃稍稍驕恣不可盡繩以文法策邕事者至欲開重鎮以復邕

州督府之舊嗟夫事固未易更亦未易言也○邕
州唐貞觀初改自南晉州者天寶間又改爲朗寧
郡故南寧之名燕之元泰定爲南寧路 國朝改
府有南城臺在城南崑崙臺之左其東北隅有臺
亭名最高臺又城北有亭在北湖上矚五花州宋
安撫使顏敏德所創也○邕州城爲宋皇祐間平
儂智高時更築善干崩顏有劉郡守者失其名夢
神人告以就蛇跡紆斜處築之離舊城三百五十
步績用告成○古邕州城在今城南二里基址尚
在邕溪水之所逕也源出欽州流經四方嶺馬

山夾古邕州前入大江攷韻書邕字从川从邑以
四方俱水也南寧故屬左江然當郡亦自有左
右江之號左出廣源右出莪利此二土州之水匯
於合江鎮流入橫州是爲鬱江鬱江左江也至潯
州與右江合右江一名黔江唐李嶠自邕州順流
詩鳴騶入嶂口汎舸歷川湄尚想江陵陣猶疑下
瀨師岸圉帆影疾風逆鼓聲遲萍葉沾蘭槳林花
拂桂旗子鳴蒼隼落劍動白猿悲芳樹迎羌管幽
篴入楚詞全軍多勝策無戰在明時寄謝山東妙
長纓徒自欺宋陶弼秋日登南城臺江國家書少

秋臺寒草生無人來遠渡盡日上高城落照懸漁
市孤煙起戍營東園故籬剩又向酒中傾又登崑
崙臺落照古城隅邊風動軍旗久閒忘戰畧多病
熟醫書白髮隨年短新情與世疎桃花春水煖還
釣舊溪魚○按李嶠字巨山唐高宗詔擊邕州叛
獠以嶠監軍嶠入其峒悉諭降之陶弼字商翁時
爲西上閣門使知邕州○元和郡國志云邕州左
右溪洞日得銅鼓相傳爲漢馬援所製形如坐螭
而空其下蒲腹皆細花紋極工緻四角有小螭螭
兩人昇行拊之聲如鞀鼓○南裔異物志云馬文

淵積石爲塘達於象浦建金標爲南極之界俞益
期牋云文淵立兩銅柱於林邑岸北有道人十餘
家居壽冷岸南與銅柱對皆以馬爲姓輿地紀勝
云唐馬總爲安南都護建二銅柱於漢故處五代
晉馬希範平群蠻亦立銅柱於溪州二公皆以爲
伏波之裔故今左右江各有其一而援之原文曰
銅柱折交趾滅交人往來疊石於下以固之唐張
籍蠻中詩銅柱南邊毒草春行人幾日到金麟王
環穿耳誰家女自抱琵琶迎海神楊用脩丹鉛總
錄云金麟之麟當作潏注水經所云金潏清渚是

伏波廟在城西岸一里唐武德初建國朝
學士張以寧詩邕州江上古祠宮傳是當年矍鑠
翁丹荔黃蕉長盛祭綠沈金鎖尚英風鼙聲夜帶
軍聲壯嵐氣秋隨劍氣空莫羨少遊鄉里志封侯
廟食至今雄以寧福建古田人使安南經此○懷
忠廟在城北宋知州事蘓緘晉江人熙寧四年交
人入寇衆號八萬緘悉力拒守外援不至乃率其
家三十六人闔門焚死緘因戰沒後交人乘勢侵
桂州行數合衆見大兵北至呼曰蘓城隍兵來交
人懼遂退郡爲立祠元祐間賜今額○淶樓廟在

府治西南五十里山麓有泉出峯坳甚清冽宋皇祐中邕守吳姓者亡其名時寇作亂吳與子三人力戰不克俱死之邕人感而立廟祀焉

宣化縣

附郭

本漢鬱林郡之領方縣晉分置晉興郡隋平陳廢郡爲縣旋改名宣化至今仍○縣治五花嶺舊三清觀基也發源自望仙坡分脈微茫突起五阜伏城內外一府治一儒學一城隍一即今縣治一天寧寺在城西僅百步許較之衢市或高一丈或高二丈或高七八尺氣脈融結有如五花故名○望

仙坡在城東北一里相對羅山古有羅秀者脩煉
在山上昇而此坡與之正對故以望仙名宋秋
青孫汚余靖征儂賊駐師於此陶淵建三公亭於
其上與望仙相拱揖者青秀山也距城東南十
里雄奇秀拔爲邕江之砥障巖洞相因出泉甘冽
羅山距城北二十里高擁南城俯瞰北湖迺秀道
人脩真之所上有北市龍潭祈禱輒應○其相連
爲馬退山山勢趨而後返如馬之退故名舊有茅
亭柳宗元爲之記又十五里爲苦竹山其山多生
苦竹延袤幾里○道人山在城東北十里形如道

人之冠因以名之○聖嶺山在城西三十里峰巒
秀聳雲鎖其巔則雨立至○都石山都名山俱在
城東六十里以山純石且產茗也西北爲都龍山
蜿蜒起伏若遊龍狀諸山聯帶隨之○思玉山在
城東七十里跨柳賓界險峻難登望如堆玉故名
又十里爲橫山宋置橫山寨者橫截江河市馬之
要區也又十里爲石燕山山出石燕天欲雨則飛
出又十里卽崑崙關孤撐巉峻在群山之上曩嘗
設險以扼蠻峒關上有臺可以瞭遠宋皇祐間爲
儂智高所據安撫使狄青破其關勝之魏禹卿西

事珥云狄武襄以上元夜奪崑崙關破儂智高關
扼賓邕兩界水南比分流勢不甚峭而險又難行
騎者亦以爲苦旁多岐嶺與諸夷通若據崑崙須
防間道云○伶俐水源出崑崙山流入大江與鬱
江合而鬱之上流曰靈犀水時有靈犀出沒亦名
靈灣其曰八尺水源出交趾界可瀘水源出大明
山龍溪源出銅鼓陂扈江源出如禾鄉者皆注之
○如禾鄉唐初置之如禾縣也初屬欽州後改屬
邕宋景祐間廢又有廢懷化州在懷化峒廢思龍
縣在思龍鄉俱唐時置宋元祐間廢○唐李翱字

書之貞元間邕州刺史時寇黃氏等爲鰲負嶠餉
乃布恩信以撫之衆皆悅服郡境始寧○呂仁邕
州司馬也景雲中鬱水橫溢民常苦之仁乃立渠
分流以泄水勢自是無浸溺之患○宋初范旻字
貴參丞相質之子嶺南初平旻知邕州爲檄邕管
雜記二卷併刻瘡病方書其諸廳壁○馬仲已字
齊賢河陽人天聖中知邕州治舍有井相承不敢
飲飲輒死仲已日汲自供傍城數里有金花水俗
言花開即瘴起人不敢近仲已故以花盛開時酹
燕其下竟無恙○陶弼永州人慶曆間知州事邕

經智高之亂物力彫耗人不樂生粥綏輯拊循忘
其勤苦諸洞獻土物求內助粥降意撫答謝却其
貲皆感化無犯邊者屬久雨慮水入城粥令民徙
居高地隨率僚吏塞琅江二門又爲土囊千餘置
道上水從竇入即塞之人民乏食發廩以賑或方
斛盛之水不及女壻者三板旬有五日乃退公私
一無所損粥久于邕爲邕人所愛戴尤喜賦詩轍
跡至處多所鐫詠云

隆安縣

在府西北
百八十里

本宣化縣之那九村先議設馱演那樓寨巡以司

彈壓嘉靖七年新建伯王守仁有事田州相度其
土曰可縣也乃請置今治額以隆安之名其城周
三百二十丈爲樓四東曰興隆西曰望仙南曰廂
泉北曰廂江城外有馬晚橋鷓鴣渡灣空渡皆以
濟大江者稍遠爲可盧江渡那緣渡又遠爲曲流
渡江源自田州來逕縣左旋繞去城五十里灣成
九曲以達郡境云○縣東江岸有三峰圓而秀與
學宮對名曰三台又五六里有芭野山巖池四塞
如城內有蓮花塔座踞一石人○感昭巖在縣西
二里其山上下昭徹故名○逍遙山在縣東四十

里高五百八嘗結雲霧過者或聞其中有鼓樂之
聲絕頂有池不溢不涸又二十里爲隴鵝山山下
有巖二亦多怪石如蓮花佛座之狀○蓋橋山在
縣南二十里中有巖穴積水架梁傳云自上古神
農時至今不朽又三十里曰梅龜嶺廣延一舍樹
木叢蔚鳥獸繁殖相傳有神龜盤在古梅樹故名
○陽明洞在縣西北三十里王文成公征思田時
舟經於此刻陽明洞天四字及平南記一篇

橫州

在府東二
百一十里

本漢合浦郡之高涼縣地元和志云今在高州界

三國吳孫休分立合浦北部以都尉領之晉武帝
平吳改合浦屬國都尉立寧浦郡隋志寧浦郡下
注云梁分置簡陽郡隋平陳後郡廢置簡州大業
二年州廢爲寧浦郡唐武德四年以鬱林郡之寧
浦樂山二縣置簡州六年改南簡州貞觀八年始
改簡州以橫槎江爲名○按廢寧浦縣在州城內
本吳昌平縣也晉更名寧浦唐爲橫州治宋以樂
山嶺山二縣併入明興省入州○廢樂山縣隋置
故城在州東南五十里州境有廢蒙澤縣唐武德
初置貞觀中省者又有廢簡陽城卽梁所分置簡

陽郡云一夫子小影石按凡而坐從以七十二弟

八

于夫子行像石吳道子所畫夫子立而顏子從以
上二石俱宋紹興中郡守何先覺刻置寧浦縣學
各有記○戒石銘在州甬道黃庭堅書○廢貢院
宋置州人章鑄有貢院上梁文見輿地紀勝○綺
川亭在州治南臨鬱水海棠亭在州西海棠橋側
舊多海棠樹故名有淮海堂在海棠亭之後爲宋
蔡觀建按少游以紹聖初削職編管橫州有書生
祝姓者居海棠橋側少游嘗醉宿其家作詞云喚
起一聲人悄余冷夢寒窗曉瘴雨過海棠春色又

添多少杜蘅釀成微笑坐破桐瓢其嚼覺傾倒急
投牀醉鄉廣大人間少○仙槎亭在城西北隅登
高嶺上州人九月登高處相傳晉咸元中隱士董
京遇一仙人秋夜橫槎于浦宋紹定間郡守張垓
因建亭曰仙槎按志橫槎浦距城西南十里源出
山谷流入鬱江有枯槎橫于灘上披葉扶疎其色
如漆光瑩照人故有橫槎館秦少游嘗寓焉○鬱
江在城南源出廣源州之廣源山流遶學前形如
半月一名月江西岸七里有立石高二丈許形如
牛皮大鐫橫州二字相傳仙人所書清江在州北

十里出石魚天陰有翼飛出武流江在州東南二
十五里源出靈山縣界俱北流入州以注于鬱○
州東十五里有古江源出震龍山流經綠藍至烏
蠻驛入于鬱設巡簡司○烏蠻一名烏濇即漢王
永所招其上爲烏巖山去州東城六十里僞漢王
名巖乃易爲烏蠻攷異物志稱烏蠻在南海郡之
西安南都統司之北即烏濇蠻也古損子產國生
首子輒解而食之曰宜弟味青則獻其君君喜之
而賞其婦娶妻美則讓其兄其國有烏蠻灘烏漢
建武中國廢如此則烏蠻之名不起自僞漢矣○

王文成謁伏波廟詩樓船金鼓宿烏蠻魚麗辟舟
夜上灘月遠旌旂千嶂靜風傳鈴柝九溪寒荒夷
未必先聲振神武由來不殺難想見虞廷新氣象
兩階千羽在雲端石廟在烏蠻山麓○志云烏石
嶺距州一里石色純盧故名○古鉢山在城北七
里頂突而圓如僧鉢蓋狀州鎮山也其脅有半山
亭鉢之左山形聯絡如九珠鉢之右山形飛翥如
九鳳皆因以名之有水出焉其旁多產香稻名香
稻溪海棠橋跨之○蕪摩嶠在城西五里傳云仙
人董奉亡後人見之于此南越志云在寧浦郡東

南一空龍山在城東十里空明一竅東西朗然又
十里爲長寨山形如立笏襟領羅羅巖者以山
平地突起如蠶房也又十里爲天窰山山有石洞
洞口有潭水產嘉魚上有二岐多怪石鐘乳靈泉
蟠繞至盡處有窟通見天日又十里爲鳳凰巖石
壁臨江巖半翠房如畫房前有臺中有柱如鰲足
旁有仙半窩後穿一竅可通巖頂日射之光入洞
口○寶華山在州南二十里其巔常有寶氣故名
昔爲雷公嶺有泉自石槽中瀉下長數十丈形如
掛練唐有二僧居之一騎白鹿一騎花虎往來入

山中人號虎鹿仙人又三十里爲東山多樟楠木
盤紆數百里武流水之源也又二十里爲天堂山
與石櫺山相對相傳古有石橋仙人會于山頂爲
雄壑所窺雷斧劈斷其橋今不可登○綠礬山在
州西六十里出綠泉多產礬石又四十里爲震龍
山山頂有潭蛟龍所居爲橫淳賓貴諸山之冠又
五十里爲飛龍山相傳昔有白龍自山飛去故名
○古辣泉在州北八十里桂海虞衡志云古辣乃
賓橫間名以墟中泉釀酒既熟不煮但埋土中日
足取出色淺紅味甘而致遠雖暴日中不壞○龍

池在橫州比唐貞觀中有女婦陳氏買魚忽有白
衣人謂之曰魚不可食可擲水中急上山避之陳
如言避於古鉢山頂回望所居皆陷爲池○梁世
基橫州人歷官大理寺丞用法平允家有荔枝生
連理神宗賜以詩曰橫浦江南岸柒家聞世賢一
株連理木五月荔枝天○嶺右遷客錄云唐杜王
倫相州人出入兩宮典機密太子失道輒當帝前
督切太子帝責其漏洩上語貶交州都督召入中
書今後李義府誣正倫交通罔上謫守橫州○張
大安繁水人上元中爲太子庶子時章懷太子在

春官今與沈馬劉納言等注范曄後漢書光宅中
出橫州司馬卒趙不尤宋太宗齋靖康之難慕
義兵與金人戰皆捷河南北盜亟避其鋒曰此小
使軍也高宗即位引衆歸補武翼郎從岳飛平湖
寇飛死檜奪其兵遣刺橫州文獻通考耕桑要
備二卷宣教郎通判橫州何先覺撰紹興癸酉序
西事垣云橫州學正劉瑄持身端謹每日授諸
生經講論不倦州守方脩學宮日親至度工諸生
曰盍往迎之瑄曰脩學有司職講學吾職也各舉
其職何以迎爲陸舜臣字師臯橫州人登正德

丙子鄉試爲雷州同知罷歸公喜著書及通賓客
如給事中吳時來主事董傳策謫籍茲土皆招致
其家時與出遊探諸幽勝賡唱輒和賓至如歸云
所著有橫州志

永淳縣

在州西百
十里

本漢鬱林郡地唐初置淳州治未定縣永貞元年
改鬱州宋初廢鬱州以未定縣屬橫州元祐初改
爲永淳縣至今因之○晚松岡在縣南一里里許
爲雷峰嶺有雷廟城東三十里又有雷巖劃壁臨
江俗名雷破巖○滕山在縣北二十里巖石滴乳

其有泉妙因名衆妙巖又十里爲龍章山相傳有
龍出人此出文彩炳然故名○魚流山在縣西六
十里山中有溪每水漲魚常順流而下○司中山
在縣西北五十里產鐵力樟楠諸大水○林公嶺
在縣南六十里昔有林姓者隱此故名○大江在
城西卽鬱江也水東江在縣東一里源出梁雞村
東班江在縣東北五里源出鎮方縣界秋風江在
縣南十里源出靈山界俱入鬱江○牛練灘在縣
南十五里中有石形如牛龍泉在城西十里有古
洞洞有石竇通於大江○嶠南瑣記云潯州西行

過橫水道上竟日無人居抵州縣坎方止日中小
憩野館蕭條叢莽荒荆句衣胥憤猿豹晝啼送卒
常百餘人云惟使車過此餘皆取間道去

新寧州

在府西
二百里

舊爲四峒介宣化江惠二州間嘉靖中峒民黃綱
率其黨效款困改四峒爲四都曰武黎曰華陽曰
沙水曰吳從隆慶間設州名曰新寧治沙都○玄
天洞在州南一里石峰特立上洞窺平仰之有隙
通天光其下爲印山○三峰山在州北環列如屏
俗名筆架山其下爲金雞巖○石龍洲在州城西

數百步連亘千丈橫截江流三面皆水中一白石
長數十丈出地不盈尺狀如鼉之蜿蜒又二百步
有迴瀾磯巨石突出橫江鬱水至此西流○慈烏
石在州東北一里卽州治之脈也磊石星布望之
如群鳥飛集雲際○鯨魚灣在州西五里群峰壁
立江畔一石不數尺垂宛若魚形又五里爲犀牛
洞洞最虛明可列數十榻有池一泓其水自石滴
下清冷不竭○獅子巖在州西北十里半山有洞
洞口寬數丈平坦如砌石覆其上又一石蹲踞若
獅故名稍入遂曲空曠竒桀萬狀再循一隙則亂

乳懸崖迥并入境○朝冠山與州治相對距二十
里羣之儼然澗水出焉合流曲折以入大江○石
人亭在州東五十里接宣化界有石如人卓立水
流若鎖鑰者○風聞四自安南界分流又自思明
龍州合巖而下○廢武黎縣在州之武黎村廢
華陽縣在之華陽都廢樂昌縣廢封陵縣俱在
武緣縣境合割入右江

上思州

在府西南
三百里

唐始置羈縻屬邕州都督府元屬思明路我洪
武初上官黃中榮內附授知州其後子孫叛服不

嘉靖十八年以州改流官屬南寧府正德六年
嘉靖元年討蕩其酋州境遂平○獅山在州
北二里一作思山州名因之相近爲文嶺山突如
三台故名山出溫泉○州前有六馬嶺其形如拜
又其東有棟鏹山山下有三百谷口○特武嶺在
州之左高百丈上有土城世傳馬伏波所立其麓
爲甘燕巖相對有胡特回車二嶺亦有土城○獨
秀峰在州東南五里其背爲獅子潭水面一石蹲
踞昂首若獅子然○明麗峽在州西八里又二里
爲鳳凰山其北曰王侯山上有解址名王侯寨○

柳槐山在州西十二里以多柳槐二樹故名又十里爲排陽嶺四周石壁山半有泉懸如瀑布下注成溪○淩玉山在州北十里雷電時出澍雨立至又十里爲北梯嶺又十里爲束香山巖峻洞深惟石層出入洞者持炬照之上有弄懷山三字○四方嶺在州西四十里其上有潭名曰天池又四十里群峯巒岼百溪叢注名曰十萬山卽明江之源也達州而西合左江水其側爲葫蘆灣○上魚江在州西南與小江水合○龍跳溪卽板龍溪去州五里上夷下銳世傳以龍躍名巖有穴數口春

左傳則魚集于巖學云

太平府

在廣西西南
二千六百餘里

領州四縣一

屬交趾郡號麗江自以來夷獠居之唐為羈縻
州隸邕都督府其後或臣或叛不常宋平嶺南立
五寨於左右二江溪洞其一曰太平與古萬遷隆
永平橫山四寨各領州縣洞屬邕州建武節度元
初仍為五寨後廢乃置太平路於麗江以控制蠻
夷我 洪武二年改太平府初治馱盧未幾復還
麗江○麗江在城南即左江也出廣源州流經憑
祥龍州合明江諸水遶郡城西南東三面至合江

鎮與祥縣水合人謂之府前江○太平城曰壺城
關曰壺關蓋江水自北來逶從東北去屈爲壺狀
故名壺關距城北三里又有廢伏波關在衣甲山
下相傳伏波征交趾所築一名威震關○金櫃山
在江之東山形如櫃其中虛明可容百人又三里
爲蛾眉山屹立雲表秀而長也相對爲白面山○
宋有鼇山道人嘗卧于州學諸生見而叱之答曰
莫欺閒客也會作詩諸生授紙筆令吟之曰家住
鼇頭最上山偶然踪跡到塵寰不妨名利場中卧
作者自忙閒自閒

崇善縣 附郭

古名崇山宋所置縣隸古萬寨元改今屬 明興
如之○西事珥云崇山卽舜放讎兜處唐沈佺期
有從崇山向越裳詩朝發崇山下暮坐越裳陰西
從杉谷度北上竹谿深按竹谿古道明水杉谷古
崇岑也九真圖云崇山至越裳四十里杉谷起崇
山竹谿從道明國來於崇山北二十五里合水歌
諫藤竹明味有三十峰夾水直上千餘仞諸仙窟
宅在焉楊用脩以爲當在交廣之域似必當地也
○志云崇官山在舊縣北二里其山空洞竅通於

江又里許爲石門山江中巨石峙立中通如門○
龍峽山在城南三里又里許爲五廩山山多羊桃
俗名五廩子○白雲山在城東四里方巖連亘
如玉屏有七洞相連而白雲最勝洞口懸石扣之
作鐘聲夜靜有光如燈出入洞門人謂之佛燈其
下有雲泉○青連山在城北十里山勢綿亘三百
餘里峰巒矗立望之青翠相連故名其陽有青山
巖高濶深邃石乳懸綴奇恠萬狀脫函成堆蓋異
境云又三十里爲盤環嶺純土可耕望見太平安
平二州又名望州嶺○熬頭山俗名雞籠山在城

東北四里卽鰲山也屹立江心其頂有方石長八尺四面花闌中有石紋自然成樹如丹桂狀○西事珥云巖淋在太平之模村入巖二十步幽暗如晦夕有野龍潛伏其中村婦每欲見之則盛飾唱土歌入巖龍乃出馴柔若素習者入村婦懷中盤伏良久乃去間脫下遺鱗婦珍藏而歸以爲獲神之貺若侮襲之雷雨驟至○飛來鐘相傳自交趾思琅州飛來者炎徼紀聞云指揮沈希儀遣舍人劉勲往相之欲槌取其銅以造軍器未至鐘數百步仆地死○龍馬泉在府南峰近江數穴與江相

廣南名勝志卷之八
通上有榕樹覆蔽成畝或曰龍潛于此即太平八
景之綠樹神湫也

左州

在府東北一百里

舊名左陽唐置隸邕州宋以隸古萬寨元改今屬
國朝因之土官黃姓洪武初黃勝爵歸附授知州
再傳子孫爭襲相仇殺成化十三年改流○州治
舊在龍村知州李欽承遷于古攬萬曆二年始建
學○天燈山在州南門外以常現仙燈故名○銀
甕山在新村其山臨江山頂有洞以古仙埋有數
十銀甕于此○金山在州西北二里有巖曰通幽

奇峰錯峙。恠石環列。上有架壑亭。鐫金山二字。亭後有流霞峰。最高。登之斯八表。在日雙清。獨秀諸峰皆聯絡焉。○雲巖山在州東三里。巖有二層。平廣如一。中多奇孔。作雲物花草狀。亦名雲州。又云落成巖。○栢嶺即北山巖也。在州治南三里。中虛可容百人。隈曲盤旋。巧緻足觀。前有二坎。深不可測。後有拱臺。若金猊座。傍垂石乳。又如白龍狀。座上有蓮花瓣。正似米麥。木犀堆積萬點。扣之鏗然有聲。○傳感山在哢亮村。離城東南八里。一水中流。奇峰對列。若煙雲花卉之狀。遇水隔處。輒負浮

廣西各府志卷之八
樣以度之詰曲環遶約里許旁通小巖皆可遊觀
有擎雲羅漢佛子度關諸臺瓊花通天石鼓諸洞
及洗心池羽化菴皆天然之妙不費雕琢○橋龍
江在州前出自陀陵之三清山合諸水流經龍光
村環州治而南入于江○龍泉在州東二里高山
聯絡一石擎起若龍頭然石下湧出源泉四時不
竭滙爲一池形如半壁北流與橋龍江合

養利州

在府北百五十里

州有養山利水合以爲名土官趙姓我 洪武初
有趙日泰者歸附授知州以次傳襲至宣德間稍

用侵其隣境殺掠萬曆三年始平之因改流○右
嵩山在州南小印山在州西各去一里印山其形
方正似之蒼秀奇特右嵩一作古嵩○弄月臺在
州東南二里田中一大石高如臺圓如月上下相
映人登其上如在月中○武陽山在州東三里有
武安洞滴水成溪與瀑布泉合流入于江名曰洞
溪之水

武康州

在府東北
二百里

舊名康山宋置縣隸遷隆寨元隸太平路 明興
知之上官楊姓成化八年其子孫楊雄傑糾合峒

賊二千餘人入宣化縣劫虜且僞署官職總兵官
趙輔等擒誅之因改流

上石西州

在府西南
百里

唐置石西州宋加上字屬永平寨元屬思明路

大明改路爲府因屬焉後乃改屬太平○州南有
白馬洞洞口隔水決乾乃行秉炬而入初暗後敞
懸石盤旋如芝如蓮如龍蛇虎豹不可勝紀右距
州三十里○州吏上官趙氏何氏黃氏凡三姓皆
絕始改流然自知州殷興爲土人毒死其後陞授
來者槩不敢入多寄孥于太平以承使令之乏萬

歷十九年知州孫繼先始新州治携家人从拓城
龍井畧改觀焉自後復鞠爲戎莽之場至天啓二
年閩人吳爾施者乃披荊棘而進著有西州小紀
一卷其詩云黃茅爲宇竹爲門斗米肩豚濁酒尊
欲向此中停信宿俄傳交趾掠前邨又幾處人煙
覆短塹山多未許牧牛羊顏祠蔓草無香火唯見
殘碑沈夕陽又百萬當年事遠征高標銅柱伏波
營受降城下徘徊久能得將軍日再生又馬跑相
傳舊有泉行人消渴欲流涎瓶中攜得家園茗太
子亭邊竹火煎

廣西名勝志卷之八